

W
P



UNITED NATIONS
United Nations Interim
Administration Mission
in Kosovo



NATIONS UNIES
Mission d'Administration
Intérimaire des Nations
Unies au Kosovo

PROVISIONAL INSTITUTIONS OF SELF GOVERNMENT

KUVENDI I KOSOVËS
СКУПШТИНА КОСОВА
ASSEMBLY OF KOSOVO

Seanca plenare e Kuvendit të Kosovës
Nr. 02-58/19-07
Prishtinë, më 30 korrik 2007
Ndërtesa e Kuvendit, salla e seancave plenare

PROCESVERBAL

Seancën e kryesoi **Kolë Berisha**, kryetar i Kuvendit, kurse i ndihmoi **Xhavit Haliti**, anëtar i Kryesisë.
Kryetari konstatoi se në seancë ishin të pranishëm 81 deputetë dhe e deklaroi të hapur punën e saj.

Kuvendi i zhvilloi punimet me këtë

REND DITE

- 1. Debat për procesin politik lidhur me vazhdimin e zgjidhjes së statusit të Kosovës**

Kryetari i njoftoi deputetët e pranishëm se anëtarët e Grupit Negociator, në bazë të kërkesës së Kuvendit, kanë shprehur gatishmëri të marrin pjesë në debatin e sotëm për procesin politik lidhur me vazhdimin e zgjidhjes së statusit të Kosovës

Ai e ftoi kryetarin e Kosovës ta marrë fjalën.

Kryetari i Kosovës, dr. **Fatmir Sejdiu**, tha se në emër të Ekipit të Unitetit do t'ju njoftoj shkurtimisht me zhvillimet kryesore që kanë të bëjnë me përcaktimin e statusit politik të Kosovës, si dhe me kahet kryesore që do t'i përcjellim bashkërisht për ta përfunduar sa më shpejt këtë proces të rëndësishëm dhe jetik për Kosovën.

Nga marsi i këtij viti, kur Kuvendi i Kosovës mbështeti propozimin gjithëpërfshirës të presidentit Ahtisari, janë bërë zhvillime të shumta politike në skenën ndërkombëtare.

Propozimi i presidentit Ahtisari, i proceduar në Këshillin e Sigurimit, krahas mbështetjes që ka marrë nga Bashkimi Evropian dhe mekanizmat e tjerë evropian, është mbështetur edhe nga ana e Sekretarit të Përgjithshëm të Organizatës së Kombeve të Bashkuara, zotit Ban Ki Mun dhe të shumicës së vendeve anëtare të Këshillit të Sigurimit. Për fat të keq, përkundër përpjekjeve të vazhdueshme dhe jashtëzakonisht intensive të shteteve të Bashkuara të Amerikës dhe të vendeve anëtare të Këshillit të Sigurimit nga Bashkimi Evropian që nëpërmjet rezolutave të bashkëspozuara nga ato të përmbyllin këtë proces me miratimin e një rezolute të re që do ta mbështeste këtë propozim, për shkak të bllokimit të vazhdueshëm me kërcënime me veto nga ana e Federatës Ruse, pas pesë projektrezolutave nuk u hodh në votim një tekst përfundimtar.

Ekipi i Unitetit, duke përcjellë me vëmendje gjithë këto zhvillime dhe duke shprehur shqetësimin e vet të institucioneve dhe të popullit të Kosovës për këto pengesa të pajustificueshme, gjatë gjithë këtyre muajve ka zhvilluar një aktivitet të gjerë e të gjithanshëm diplomatik me qëllim të argumentimit dhe të sigurimit të mbështetjes tek të gjitha vendet anëtare të Këshillit të Sigurimit për pavarësinë e Kosovës.

Ekipi i Unitetit gjatë kësaj periudhe ka intensifikuar aktivitetin e tij sidomos në kontaktimin e vendeve anëtare të Këshillit të Sigurimit nga Bashkimi Evropian si dhe me zyrtarët më të lartë të Shteteve të Bashkuara të Amerikës.

Duke parashikuar paperspektivën e kapërcimit të një rezolute, që do të mbështeste propozimin e Ahtisarit në Këshillin e Sigurimit, këta faktorë kanë propozuar qasjen alternative në një proces të ri të angazhimeve për të siguruar mbështetjen e propozimit të Ahtisarit dhe njohjen e koordinuar të pavarësisë së Kosovës pas një angazhimi shtesë prej 120 ditësh.

Ekipi i Unitetit, duke i analizuar në thellësi të gjitha këto zhvillime ka shprehur gatishmërinë e tij që të kontribuojë në këtë proces të ri të angazhimeve, pra në këtë qasje alternative për të përmbyllur procesin e pavarësimit të Kosovës.

Duke pasur parasysh Rezolutën e Kuvendit të Kosovës lidhur me procesin e definimit të statusit politik të Kosovës, të majit 2005, duhet theksuar në veçanti:

1. Në këtë proces të angazhimeve shtesë në nivelin e Grupit të Kontaktit, Kosova ua ka bërë me dije të gjithë faktorëve relevantë ndërkombëtarë se pavarësia e Kosovës është e panegociueshme.
2. Integriteti territorial dhe funksional i Kosovës është i pacenueshëm. Kosova është unike dhe e pandarë.
3. Propozimi i gjithëpërfshirës i Presidentit Ahtisari konsiderohet dokument i përfunduar dhe i mbyllur për ne dhe si i tillë nuk mund të hapet e as nuk mund të negociohet.

4. Ekipi i Unitetit mendon se gjatë kësaj periudhe, në konsultim me përfaqësuesit e Bashkësisë Ndërkombëtare do të japë kontributin e vet maksimal në trajtimin e aspekteve të veçanta të temave që kanë të bëjnë me relacionet e ardhshme të Kosovës dhe të Serbisë si shtete të pavarura.

5. Ekipi i Unitetit konsideron se kjo do të jetë vonesa e fundit në këtë proces dhe se nuk mund të pranojë shtyrje të tjera të afateve.

6. Ekipi i Unitetit zotohet se gjithë këtë proces në vijim deri në përfundimin e tij, duke llogaritur edhe marrjen e vendimeve të rëndësishme në Kuvendin e Kosovës, pra shpalljen e pavarësisë së Kosovës, do ta bëjë në partneritet dhe në bashkëpunim të ngushtë me Shtetet e Bashkuara të Amerikës dhe me Bashkimin Evropian.

7. Ekipi i Unitetit, gjatë kësaj kohe, me institucionet e tjera të Kosovës do të angazhohet për përgatitjen e Kosovës me gjithë strukturën kushtetuese dhe legjislative dhe institucionale për të lehtësuar kështu edhe rrugën tonë si shtet i pavarur dhe sovran drejt integritetit në Bashkimin Evropian, në mekanizmat dhe organizatat ndërkombëtare dhe në NATO.

Kryetari e ftoi kryeministrin e Kosovës ta marrë fjalë.

Kryeministri **Agim Çeku** tha se të gjithë kemi pritur se procesi i pavarësisë së Kosovës do të përfundojë shumë më herët. Prosesi i realizimit të pavarësisë së Kosovës përmes Këshillit të Sigurimit, do të ishte zgjidhja më e mirë të cilën e kemi dëshiruar, por fatkeqësisht ka dështuar.

Kjo nuk duhet të na dekurajojë. Përkundrazi, duhet të na bëjë edhe më të vendosur, edhe më këmbëngulës të gjejmë zgjidhje të shpejtë dhe të drejtë në partneritet të plotë me miqtë tanë ndërkombëtarë.

Me gjithë dështimin në miratimin e Rezolutës në Këshillin e Sigurimit, ne duhet ta ruajmë besimin në Shtetet e Bashkuara të Amerikës dhe në Unionin Evropian.

Në takimet që i kemi pasur me miqtë tanë ndërkombëtarë ua kemi bërë shumë të qarta qëndrimet tona. Kemi dëshmuar se Kosova është e gatshme për pavarësi dhe t'i përballojë të gjitha sfidat e pavarësisë, t'i marrë të gjitha përgjegjësitë e pavarësisë.

Ne do ta mbështesim dhe ruajmë partneritetin me Bashkësisë Ndërkombëtare për një angazhim intensiv prej 120 ditësh, por duke qenë shumë të qartë se pavarësia, pakoja e Ahtisarit dhe tërësia e territoriale e Kosovës nuk janë tema për diskutim.

(Fjala e plotë e kryeministrit është dhënë në transkript).

Kryetari e ftoi anëtarin tjetër të Ekipit të Unitetit, kryetarin e Partisë Demokratike të Kosovës, ta marrë fjalën.

Hashim Thaçi tha se pavarësia e Kosovës, sfida e madhe me të cilën ballafaqohemi sot, nuk ka të bëjë me a fatet kohore, ultimative, apo me datat e parapëlqyera nga ne. Negociata për pavarësinë e Kosovës nuk do të ketë. Komuniteti ndërkombëtar ka përkrahur dhe respektuar vullnetin e qytetarëve të Kosovës për pavarësi. Angazhime shtesë, të përgjegjshme dhe intensive, do të ketë. Kjo ka të bëjë me përgjegjësitë tona që ne si lider i kemi ndaj qytetarëve dhe vendit tonë me synim që të lëvizim përpara më shpejt.

Të gjithë ne duhet kuptuar se, ashtu siç bota nuk na la të vetmuar para tetë vjetësh, as ne nuk do të heqim dorë nga bota perëndimore.

Sot duhet të kuptojmë dhe t'u themi qytetarëve në mënyrë shumë të sqartë se çelësi nuk është tek deklaratat apo rishpallja, por tek domosdoshmëria e njohjes ndërkombëtare të pavarësisë së Kosovës. Mënyra e veprimit tonë do të përcaktojë modelin e Kosovës që do ta ndërtojmë në të ardhmen.

Tani, më shumë se kurrë më parë, kërkohet udhëheqje e përgjegjshme dhe unike. Është obligimi ynë për të punuar me botën e lirë dhe demokratike me qëllim që të bëjmë ëndrrën në të drejtën tonë realitet dhe ne nuk do të largohemi nga partneriteti me botën e lirë.

Në këtë proces, Ekipi i Unitetit ka bërë punën më të mirë për zyrtarizmin e shtetit të Kosovës. Sot pavarësinë e Kosovës e përkrahin Shtetet e Bashkuara të Amerikës, Bashkimi Evropian dhe vendet e tjera.

(Fjalimi i plotë i zotit Thaçi është dhënë në transkript).

Kryetari e ftoi anëtarin tjetër të Ekipit të Unitetit, kryetarin e Partisë Reformiste ORA, ta marrë fjalën.

Veton Surroi tha se jemi në një situatë delikate dhe çdo ditë që shkon, do të jetë më e vështirë në këtë ecje. Kemi kaluar nga një koncept i cili e kishte rrjedhën e vet logjike. Tash bëhet kalimi nga ky koncept në një koncept ende të padefinuar, ende në përpunim e sipër, në të cilin ka ende shumë pikëpyetje. Kalimi prej një koncepti në konceptin tjetër, në fakt, na ka dobësuar edhe ne si Ekip Negociator, jo me dëshirën tonë, jo me vullnetin tonë. Pasoja e dytë është se, duke marrë pjesë në një koncept negociator, ne i kemi shpenzuar të gjitha mundësitë për koncesione. Kosova nuk ka çka të marrë pjesë më në negociatë, sepse nuk ka çka të japë më si koncesion.

Me këtë bagazh rreziqesh duhet të shikojmë se çka mund të bëhet më mirë dhe më shumë.

Çështja e parë është krijimi i një natyre të re të partneritetit. Ne duam jo ta prishim partneritetin, por duam të jemi partner aktiv, jo transmetues të politikave.

Çështja e dytë është që duhet të formalizojmë kanalet tona të komunikimit. Kosova ka hyrë në një proces negociator me dobësinë e mungesës së shërbimit të vet diplomatik.

Çështja e tretë është që duhet të manifestohet më shumë autonomia vendimmarrëse e politikës sonë, e këtij Kuvendi, e kësaj Qeverie, e të gjitha institucioneve tona.

(Fjalimi i plotë i zotit Surroi është dhënë në transkript).

Kryetari i Kuvendit të Kosovës, **Kolë Berisha**, anëtar i Ekipit të Unitetit – tha se zvarritjet dhe shtyrjet e shpeshta të afateve për zgjidhjen e statusit të Kosovës; tërheqja e çështjes së Kosovës nga KS i OKB-së, ku, Rusia, me një fanatizëm tradicional, i refuzoi, një nga një, të gjitha rezolutat e hartuara nga perëndimorët; dërgimi i pakos së Ahtisarit në Grupin e Kontaktit; propozimi për të ashtuquajturat “negociatë shtesë” në kohëzgjatje prej katër muajsh; qëndrimi rus edhe më tej i paluhatshëm kundër pavarësisë së Kosovës që solli deri te

hezitimi ose luhatja e disa vendeve dhe, shtruarja, ose rilansimi i tezës për ndarjen e Kosovës, të gjitha këto, lënë hapësirë për shqetësime.

Por, për asnjë moment, nuk mund të pranohet droja se, sot, në fillim të shekullit XXI, një populli, i cili, kohë më parë, në sajë të angazhimit të tij, por edhe me ndihmën e miqve të shumtë, diti ta mbijetojë apokalipsin.

Ne nuk kemi më nevojë, që me akte të njëanshme, t'i tregojmë vetes dhe botës se çka duam.

Që me Referendumin e vitit 1990, pastaj me atë rezistencën tonë të qetë, por aktive; me rebelimin, mosnjohjen dhe mospranimin e organeve të pushtetit serb, dhe me ndërtimin e institucioneve tona; me nxjerrjen e Deklaratës Kushtetuese të 2 Korrikut dhe me Kushtetutën e 7 Shtatorit; me thyerjen e propagandës mbi dyqindvjeçare serbe kundër shqiptarëve; pastaj me luftën e armatosur që bënë djemtë dhe vajzat tona; me krijimin e një numri të madh miqsh nga mbarë bota, e sidomos me SHBA-në, e cila, nga 24 marsi e deri më 9 qershor 1999, u priu nëntëmbëdhjetë shteteve - anëtare të NATO-s, në intervenimin mbi caqet ushtarake dhe policore në Serbi; me administrimin e Kosovës nga Misioni i Kombeve të Bashkuara, pra me të gjitha këto ne kemi bërë shpëtim totalë nga sundimi serb.

Ne, si Kuvend, mund të marrim ndonjë qëndrim konform situatës aktuale, por ky Kuvend nuk do të bëjë ultimatume, nuk do të caktojë data, nuk do të premtojë vendime apo vepime të pamatura. Kuvendi i Kosovës do të marrë vendimin e duhur në kohën e duhur dhe në partneritet me miqtë ndërkombëtarë.

(Fjalimi i plotë i kryetarit të Kuvendit është dhënë në transkript).

Pastaj, **kryetari** e hapi debatin për procesin politik lidhur me vazhdimin e zgjidhjes së statusit të Kosovës.

Në emër të Grupit Parlamentar të LDK-së, **Alush Gashi** tha se mbështet fjalën e Presidentit të Kosovës, Fatmir Sejdiu.

Ne sot nuk kemi shumë arsye që të jemi të shqetësuar se a do ta arrijmë pavarësinë, a jo. Hera e parë në historinë e vendit tonë dhe të këtij populli në takime zyrtare në tryezë është në mbështetje të plotë pavarësia e Kosovës nga pjesa dërmuese e anëtarëve të Këshillit të Sigurimit, të unitetit të plotë të Bashkimit Evropian si dhe të një numri të madh të shteteve që përbëjnë Asamblenë e Përgjithshme të OKB-së.

Andaj, Lidhja Demokratike e Kosovës, e cila ka mbështetur Rezolutën për Ekipin e Unitetit, rikonfirmon mbështetjen e plotë dhe përcaktimin që Presidenti i Kosovës, së bashku me Delegacionin e Unitetit të mos lëvizë nga qëndrimet e votuara në Rezolutën e Kuvendit të Kosovës, qëndrime këto që sot kondensohen në fjalën e Presidentit të Kosovës.

Në emër të Grupit Parlamentar të PDK-së, **Jakup Krasniqi**, tha se këtë seancë e kemi thirr për të debatuar për pengesat e paarsyeshme që po i bëhen njohjes ndërkombëtare të shtetit të pavarur dhe sovran të Kosovës, të krijuar me Luftën Çlirimtare të UÇK-së dhe me mbështetjen e kësaj lufte nga NATO-ja dhe e gjithë bota demokratike.

Nuk jemi ne të vetmit që me luftë çlirimtare e bëmë shtetin. Të gjitha shtetet e OKB-së nga luftërat kanë dalë. Nga luftërat kanë dalë edhe vendet anëtare të Këshillit të Sigurimit, edhe shteti ynë nga lufta ka dalë.

Njohjen ndërkombëtare ne e pritëm në fund të vitit 2006. Në fakt ndodhi shtyrja pa arsye. Ajo nuk ndodhi as në vitin 2007. Njohja e pavarësisë së Kosovës shtet i pavarur dhe sovran është dashur të ndodhte në vitin 2000-2001, atëherë kur duhej të ndëshkohej gjenocidi serb i ushtruar mbi 100 vjet mbi shqiptarët dhe hapësirat e tij.

Në situatën e krijuar, ky Kuvend më së paku duhet të konfirmojë Rezolutën e miratuar në fillim të procesit politik dhe të miratojë një deklaratë që t'i konfirmojë edhe njëherë disa qëndrime që janë minimumi i kërkesave tona:

1. Të konfirmojë përcaktimin e njohur të arritur në luftën çlirimtare për pavarësinë e sovranitetit të shtetit të Kosovës. Nëse edhe pas 6 muajve ose pas mbylljes së kohës shtesë të afatizuar nuk njihet me automatizëm pavarësia e Kosovës, Kuvendi i Kosovës duhet ta obligojë Kuvendin e ardhshëm që të shpallë pavarësinë dhe sovranitetin e shtetit të Kosovës dhe të kërkojë njohjen ndërkombëtare të tij.
2. Të konfirmojë zbatueshmërinë e dokumentit të presidentit Ahtisari mbi pavarësisë dhe sovranitetin e shtetit të Kosovës.
3. Të marrë përgjegjësinë për realizimin e decentralizimit në tërë hapësirat e shtetit të pavarur sovran të Kosovës, pa dallime etnike e për të gjithë qytetarët.
4. Institucionet e shtetit të Kosovës duhet të respektojnë tri parimet kryesore të Grupit të Kontaktit të deklaruara në fillim të këtij procesi.
5. Të zotohen se do të respektojnë vlerat evropiane që ndihmojnë në integrimin e vendit në Bashkimin Evropian dhe në Aleancën Veriatlantike.
6. Kërkojmë nga vendet e botës demokratike, Bashkimi Evropian, Shtetet e Bashkuara të Amerikës, si dhe nga OKB-ja dhe Këshilli i Sigurimit që ta respektojnë e mbrojnë dokumentin e Presidentit Ahtisari.

Në emër të Grupit Parlamentar të AAK-së, **Gjylnaze Sylja**, tha se ne sot jemi në një udhëkryq në rrugën drejt pavarësisë. Ne tani dimë diçka më qartë se kurrë më parë se ky është Kuvendi që do ta shpallë pavarësinë e vendit tonë.

Në përputhje me këtë, i propozoj Kuvendit të Kosovës që të formojë një trup të veçantë gjithëpërfshirës, një Asamble Parlamentare për shpalljen e pavarësisë. Asambleja Parlamentare për shpalljen e pavarësisë nuk duhet të përbëhet nga partitë politike, por nga anëtarët e këtij Kuvendi. Kjo asamble do të përcaktojë parimet e saj, do t'i argumentojë ato dhe to të hartojë një projektdeklaratë që duhet t'i parashtrohet Kuvendit për miratim.

Sot nuk është dita për t'i hyrë çështjes se kur duhet shpallur pavarësia. Ky Kuvend i ka dhënë mandat Grupit Negociator të Kosovës dhe ne presim që anëtarët e tij të vazhdojnë të ushtrorjnë mandatin që ua kemi deleguar. Detyrimi ynë tani përmes themelimit të Asamblesë

Parlamentare është që të shtrojmë rrugën për të përmbushur pjesën e mbetur të përgjegjësiave tona.

Plani i Ahtisarit mbetet modeli më i mirë për Kosovën, për harmonizimin e interesave tona shtetërore me nevojën për një partneritet të ngushtë dhe efektiv me komunitetin ndërkombëtar.

Në emër të Grupit Parlamentar të ORA-s, **Teuta Sahaqija**, tha se ne e përkrahim diskutimin e kryetarit të Partisë sonë lidhur me këtë proces dhe, gjithashtu, përkrahim që ky Kuvend të mbledhë edhe përpara shkuarjes së Ekipit të Unitetit në Uashington.

Ky proces nuk përfundoi ashtu qysh e pritëm të gjithë, që të përfundojë më 2006, që të dorëzohet në Këshillin e Sigurimit dhe të ndryshohet Rezoluta 1244. Por, ky proces ndryshoi dhe tash jemi para një realiteti të ri.

Partneriteti i ri duhet të tregojë një kualitet tjetër, Ekipi i Unitetit të jetë partner më aktiv dhe përmes tij të dëgjohet zëri i deputetëve dhe me zërin e deputetëve të dëgjohet edhe zëri i Kosovës.

Është koha kur Kuvendi duhet ta rikthejë rolin e vet dhe ky proces të tentojë të përfundojë përpara Vitit të Ri, përpara Kërshëndellave, përpara skadimit të afatit të këtij Kuvendi.

Në emër të Grupit Parlamentar 6+, **Mahir Yagcilar** tha se Kosova po kalon nëpër një periudhë historike dhe kritike. Së këndejmi, të gjithë duhet të jemi në nivel të detyrës dhe me një seriozitet më të lartë t'i qasemi situatës së rikrijuar dhe qasjes së re të bashkësisë ndërkombëtare ndaj zgjidhjes së statusit përfundimtar të Kosovës.

Prandaj, vazhdimin e negociatave edhe për 120 ditë duhet ta shndërrojmë në përparësi tonën, për t'i dëshmuar botës dhe të gjitha shteteve që kanë mëdyshje rreth njohjes së pavarësisë së Kosovës, se jemi të pjekur për pavarësi, se pavarësia e Kosovës do të sjellë stabilitet në rajon dhe do të krijojë kushte për jetë më të mirë për të gjithë qytetarët e Kosovës.

Në këto periudha kritike duhet të jemi të kujdesshëm dhe të durueshëm, t'i bëjmë për vete sa më shumë shtete dhe në partneritet me SHBA-të dhe BE-në, gjendjen de-fakto të Kosovës së pavarur ta shndërrojmë edhe në de-jure.

Në emër të Grupit Parlamentar për Integrim, **Numan Baliq**, tha se Pakoja e Ahtisarit është në krizë. Pasi që është miratuar, tani kemi lëvizje; tashmë po paralajmërohet tërheqja e saj. Negociatat e paralajmëruara nuk është fare e sigurt se kur do të fillojnë, askush nuk garanton se si do të përmbyllën negociatat, askush nuk garanton që statusi do të zgjidhet gjatë këtij viti. Gjithnjë e më shumë bëhet fjalë për kompromisin e mundshëm që me siguri për ne kosovarët do të jetë i dhembshëm dhe i hidhur.

Statusi i Kosovës nuk do të zgjidhet gjatë këtij viti. Pra, ne jemi në situatë që të mendojmë seriozisht për atë se çka na pret dhe të gjejmë zgjidhje për çështjet e tilla. Propozoj që ta ndryshojmë qëndrimin e tërësishëm ndaj kësaj çështjeje. Duhet ta tërheqim një vijë dhe duhet të kalojmë nga politika pasive, në politikë aktive.

Propozim imi është që ne nuk mund t'ia japim në formën blanko fatin e Kosovës kujtdo qoftë në botë, as Shteteve të Bashkuara të Amerikës, as Evropës, as kujtdo qoftë pa na garantuar në mënyrë të qartë se: “do ta fitoni shtetin në këtë dhe në këtë datë, në këtë dhe në këtë muaj”. Pa këtë nuk ka lëshim të fatit blanko. Këtë nuk e bën asnjë popull politik në botë. Ne kosovarët nuk guxojmë ta bëjmë një gjë të tillë.

Emrash Xhemajli (LPK) tha se çështja e Kosovës ka tetë vjet që është duke u sjellë në një rreth vicioz, i cili tani është më i dukshëm se kurrë. Shprehim keqardhjen tonë të thellë për dështimet e deritashme që përmes Këshillit të Sigurimit të kalojë çështja e pavarësisë së Kosovës. Ka mbetur edhe një rrugë pa u provuar, që Kuvendi i Kosovës, Qeveria, Presidenca dhe populli i Kosovës, në koordinim në mes veti dhe me aleatët e Kosovës, të koordinojnë shpalljen e pavarësisë përmes Kuvendit, përmes formave demokratike - referendumit ose propozimeve që u dhanë këtu.

Në emër të LPK-së jam kundër çfarëdo bisedimi me Serbinë para shpalljes dhe njohjes së Kosovës shtet i pavarur dhe sovran. Bisedime duhet të ketë gjithmonë mes shteteve, por ato sot me Serbinë më nuk kanë kuptim.

Opinione, vërejtje dhe sugjerime për procesin politik lidhur me vazhdimin e zgjidhjes së statusit të Kosovës dhanë edhe këta deputetë: **Naim Maloku, Bajaram Kosumi, Xhezair Murati, Nait Hasani, Xhevat Bislimi, Demir Limaj, Sabri Hamiti, Behxhet Brajshori, Xhavit Haliti, Selvije Halimi, Sanije Aliaj, Ymer Halimi, Hydajet Hyseni, Fetah Berisha, Nimon Alimusaj, Melihate Tërmkolli, Ymer Muhaxheri, Mazllom Kumnova, Myrvete Dresha-Baliu, Fadil Geci, Ramadan Musliu, Nazim Jashari, Bajrush Xhemajli, Besa Gaxheri, Nekibe Kelmendi, Bujar Dugolli, Ferid Agani, Mark Krasniqi, Gjergj Dedaj, Hatixhe Hoxha, Zef Morina, Hajredin Kuçi, Genc Gorani, Teuta Hadri, Ragip Zekolli, Ramadan Kelmendi, Fehmi Mujota, Xhelal C anziba dhe Qibrije Hoxha, të cilat i janë bashkangjitur transkriptit.**

Në fund të debati, **Jakup Krasniqi** propozoi që Kuvendit t'i miratojë këto

REKOMANDIME

1. Kuvendi i Kosovës ta konfirmojë fuqishëm Rezolutën e 17 nëntorit 2005, kurse nga Grupi Negociator kërkohet që t'i përmbush obligimet që dalin nga kjo rezolutë.
2. Kuvendi i Kosovës do të jetë në seancë të përhershme për t'i përmbushur obligimet e veta për procesin politik, në çdo kohë e pa procedura administrative.
3. Kuvendi i Kosovës autorizon Grupin Negociator që ta hartojë një platformë politike unike për përfundimin e procesit politik për shtet të pavarur dhe sovran, duke respektuar edhe kërkesat e këtij debati të frytshëm që u zhvillua sot.

Në fund të debatit edhe njëherë fjalën e morën anëtarët e Grupit Negociator, të cilët i falënderuan deputetët e Kuvendit për kontributin dhe mbështetjen e dhënë.

Ata deklaruan se do vazhdojnë të punojnë, në përputhje me mandatin e dhënë sipas Rezolutës së Kuvendit të Kosovës, për realizimin sa më të shpejtë të mundshëm të njohjes së Kosovës shtet të pavarur dhe sovran.

Në fund, kryetari i Kosovës, **Ftahir Sejdiu**, iu drejtua deputetëve të Kuvendit duke theksuar se Kuvendi i Kosovës, si institucioni më i lartë i vendit, ka përkushtimin e tij të thellë që procesin e filluar të pavarësisë së Kosovës do ta përfundojë duke kontribuar maksimalisht me gjithë mekanizmat e tij, me Ekipin e Unitetit, me në një partneritet me të gjithë miqtë e Kosovës dhe me të gjithë mekanizmat ndërkombëtarë, që e kanë kuptuar shumë thellë që çështja e Kosovës paraqet një nga sfidat më të drejtpërdrejta dhe më me peshë në Evropën Juglindore që duhet të mbyllet konform vullnetit politik të popullit të saj.

Ju falënderoj për besimin ndaj Ekipit të Unitetit. Ka edhe momente të cilat duhet t'i operojmë në cilësinë e një ekipi, në cilësinë e një formacioni që ka marrë barrë dhe është përgjegjësi e jona që pikërisht buron edhe nga Rezoluta e nëntorit 2005 dhe nga politika jonë e përgjithshme që t'i referohemi dhe që ta kemi busullën qendrore të orientimeve tona nga e cila nuk ka shmangie.

Kemi një agjendë të formacionit të përbashkët për të prezantuar këtu para vetes dhe në agjendën tonë është e rëndësishme që në këto momente të nxitjes së veprimeve tona sa më me urgjencë të kryhet ky proces, që në festën e pavarësisë së Kosovës t'i kemi edhe miqtë tanë që kanë ndihmuar Kosovën në vitet më të vështira, t'i kemi ata që i quajmë partnerë, ata që e mbrojnë Kosovën nga oguret e vazhdueshme që i sillen përreth, ata që e duan dhe e kanë shtrirë dorën për Kosovën që të ecim në integrimet euroatlantike dhe që nuk janë të paktë.

Kryetari e deklaroi seancën të mbyllur në orën 20 : 40 minuta.

Kryetari i Kuvendit të Kosovës
Kolë Berisha

E hartoi:

Divizioni i Çështjeve Plenare dhe Procedurale